

Kevin Brunold per Stefan Engler

In nov timun e discussiun davart il num tar la PCD dal Grischun

DA MARTIN CABALZAR/FMR

■ Il directori da la Partida cristiandemocratica dal Grischun (PCD) propona d'eleger Kevin Brunold sco successur da Stefan Engler al timun da la partida. Nova vice-presidenta duai Yvonne Brigger-Vogel daventar. A la delegada da la PCD, convocada per ils 2 da settember 2020 en la sala dal Marsöl a Cuir, han delegadas e delegads tranter auter era d'eleger ils organs da partida per ina nova perioda d'uffizi. Suententer passa ogt onns al timun da la PCD grischuna ha cusseglier dals chantuns *Stefan Engler* renunzià ad ina reelecziun. Remess ses uffizi ha er la vice-presidenta deputada *Silvia Casutt-Derungs* da Falera. Per preparar las elecziuns ha il directori installà ina cumissiuon da tscherna e propona il deputà *Kevin Brunold* sco nov parsura da la PCD dal Grischun. Brunold è dapi 2018 deputà dal circul da Ilanz/Foppa en il Cussegl grond ed è parsura da la PCD Surselva. Professiunalmain è Kevin Brunold engaschà sco mainagestiuon da Surselva Turissem. El viva cun sia famiglia a Surcuolm, ha absolvi in emprendissadi da banca e studegià economia da manaschi. 2018 è el stà vicepresident dal comité d'organisaziun dal Tir chantunal ed el è era commember da la suprastanza d'Opera Viva Sursaisa.

Elecciuns dal directori

Sco nova vicepresidenta propona il directori *Yvonne Brigger-Vogel* da Zezras. Ella è gestiunara da la Cuminanza d'interess Turissem Grischun (ITG) ed ha gia acquistà experientscha politica sco candidata per las elecziuns dal Cussegl naziunal da l'onn 2019.

Its ulteriurs commembers da la giunta stattan vinavant a dispusiziun: *Alessandro Della Vedova* sco vicepresident, *Livio Zanetti* sco cassier, *Nicolina Laim* sco assessura e *Reto Cramer* sco pledader da medias. Al directori appartegnan ex officio plinavant ils cussegliers guvernativs *Marcus Caduffe Mario Cavigelli* e cusseglier naziunal *Martin Candinas*. Sco cus-



Kevin Brunold duai succeder a Stefan Engler al timun da la PCD dal Grischun.

MAD

seglier dals chantuns vegn er *Stefan Engler* a far vinavant part ex officio da quest gremi.

Engraziament al parsura partent

La PCD dal Grischun engrazia *Stefan Engler* per sia lavur prestada en favur da la partida. Tras sia direcziun premurusa e precauta saja reussì a la partida d'acquistar in segund mandat en la Regenza e da mantegnair sia forza numerica tant en il Cussegl grond sco tar las elecziuns dal Cussegl naziunal. Sco la partida scriva haja il parsura partent bulà fermamain la partida sco «forza burgaisa dal center e fatg fitta ella per l'avegnir». La PCD è persuadida da stgaffir cun in team nov e motivà la basa per in bun avegnir da la PCD dal Grischun e per s'engaschar vinavant «per distgargiar las familias, rinforzar las regiuns ed il sustegn da manasch pitschens e mesans».

Midar num e fusiunar?

Sin plaun naziunal funcziuna la fracziun cuminaivla dal mez cun PCD, PBD ed EVP bain, uschia ch'ina fusiun è – abstrahà da la renunzia al «C» - betg fitg dispaivla. Auter sa preschenta la situaziun sin plaun chantunal. Entaifer la PCD grischuna procura la renunzia al «C»h ed

ina eventuala fusiun cun la PBD però per discussiuns vaira animadas. Tant en il ravgugl la PCD sco entaifer la PBD èn ils «vegls» apparentamain plitost sceptics envers ina midada dal num ed in'eventuala fusiun, entant ch'ils «giuvens» èn pli averts. Las differenzas d'avis tranter las generaziuns èn d'attribuir cunzunt a l'istorgia, nua che la PCD vegniva indentifitgada ferm cun catolic e la SVP/PBD ferm cun reformà. Tant las finamiras sco ils cuntengs politics èn oz sumegliants ed era la forza politica da PCD e PBD è en il Grischun pli u main equivalenta.

Sco quai ch'il parsura partent *Stefan Engler* è s'exprimi en in'intervista en la «Südostschweiz am Wochenende» na dati per el nagin motiv da renunziar al «C». Er *Engler* afferma dentant la necessitad d'unir e rinforzar las forzas politics dal spectrum mez sin plaun naziunal, per che questas partidas na vegnian la finala betg absorbadas dals pols da dretg e sanester. El è dentant sceptic, schebain midar num e logo sco instrument da marketing tanscha ed è abel da mobilisar in pli grond electorat, senza perder ils aderents tradiziunals. Schi dettia dentant ina fusiun sin plaun naziunal stoppia era la collavuraziun da PCD e PBD vegnir definida da nov. I na possa betg esser che las duas partidas fu-

La PCD porta Remo Cavegn

(fmr/mc) La fracziun cristiandemocratica dal Cussegl grond propona ses schef da fracziun *Remo Cavegn* sco candidat per il presidi da la Dretgira chantunala. Plinavant propona ella la reelecziun da ses commember *Fridolin Hubert* sco derschader chantunal e *Giuliano Racioppi* sco derschader administrativ. Per garantir la cuntinuitad, stabilitad e concordanza e las dretgiras chantunales sustegn la PCD plinavant er las candidaturas dals derschaders en uffizi *Michael Dürst* e *Micha Nydegger*. Per che l'italianitad saja vinavant preschenta en la Dretgira chantunala beneventa la PCD er la reelecziun da *Davide Pedrotti*, ella sustegn dentant er la nova candidatura da *Christof Bergamin* da la PS. Tar la candidatura persunala da *Peter Schnyder* suonda la PCD la recumandaziun da la cumissiuon da justia da betg reelegger el pli. Dal reminent na porta la PBD betg pli ses anteriur candidat *Peter Schnyder*, uschia che quel è extrà da la partida. Sustegnids cun gronda maioritad da la PCD vegnan er ils derschaders en uffizi dal Tribunal administrativ.

La fracziun da la PCD quinta che las mancanzas eruidas en il rapport *Stalder/Uhlmann* vegnian eliminadas e che las dretgiras sa stentian da far tut il pussaivel per liquidar il culm da pendenzas e vegn a s'engaschar per in revisiun parziala da la lescha organisorica da las dretgiras cun procurar per derschadras e derschaders supplementars.

siunadas sin plaun naziunal cumbattian ina l'autra tar las elecziuns da la Regenza e dal Cussegl grond, remartga *Engler* en la SO am Wochenende.